

2017-imut Ilassutissatut aningaasaliissutinit Inatsisissatut siunnersuut (Aningaasaqarnermut Naalakkersuisoq)

Saqqummiussissut

(Aningaasaqarnermut Naalakkersuisoq)

1. Siullermeerneqarnera

Naalakkersuisut sinnerlugit matumuuna 2017-imut Ilassutissatut aningaasaliissutinit Inatsisissatut Siunnersuut saqqummiuppara. Inatsisartut Naalakkersuisullu pillugit Inatsisartut inatsi-saanni § 16-imi ersersinneqarpoq: Inatsisartut Aningaasaqarnermut Ataatsimiititaliaata aningaasar-tuutissatut akuersissutai ukiumoortumik ilassutissatut aningaasaliissutinit inatsimmi, ukiumi ani-ngaasanut inatsiseqarfusumi tulliuttumi Inatsisartut ileqquusumik siullermeerlutik ataatsimii-neranni oqaluuserineqartussami katersorneqassasut.

2017-imut Ilassutitut Aningaasaliissutinit inatsisissatut siunnersuut taamaalilluni kingumoor-tumik aningaasaliinertut isigisariaqarpoq. Aalajangiinerit aningaasanut inatsimmi oqaaserta-liussatigut piginnaatitsissutit malillugit Naalakkersuisut, Inatsisartut Aningaasaqarnermut Akileraartarnermullu Ataatsimiititaliaata aamma Inatsisartut Suleriaaseq pillugu Ataa-tsimiititaliaata 2017-ip ingerlanerani aalajangiiffigereersimasaat ilassutitut aningaasaliissuti-nut inatsimmi aaqqissuunneqarput. 2017-imut Ilassutissatut aningaasaliissutinit Inatsisissatut Siunnersuummut ilanngunneqarsimapput ilanngussaq 1 aningaasaliissutinik 2017-imi akuersissutigineqartunik takutitsisoq aamma ilanngussaq 2 2017-imi oqaasertaliussanut allannguutitut akuersissutigineqartunik takutitsisoq.

2017-imut Aningaasanut inatsit aamma 2017-imut ilassutissatut aningaasaliissutinit inatsi-sissatut siunnersuut ukiumut aningaasanut inatsiseqarfusumut 2017-imut ataatsimut aningaa-saliissutinit tunngavoq. Taakku taamaalillutik Nunatta Karsiata 2017-imut Naatsorsuutaanut tunngaviupput Inatsisartut ataatsimii-nissaanni oqaluuserineqartussatut ilimagineqartut.

2017-imut Aningaasanut Inatsit IST-mut missingersuusiarineqarsimasoq 46,4 mio. kr.-nik amigartooruteqarfiussasoq aamma IS-imut missingersuusiarineqarsimasoq 21,7 mio. kr.-nik sinneqartooruteqarfiussasoq takutitsivoq.

Inatsisartut Aningaasaqarnermut Akileraartarnermullu Ataatsimiititaliaata aamma Inatsisartut Suleriaaseq pillugu Ataatsimiititaliaata 2017-ip ingerlanerani ilassutitut aningaasaliissutit ka-tillugit arfinillit akueraat, taamaalilluni IST-mi inernerussatut missingersuutit 52,1 mio. kr.-nik ajornerulersillugit aamma IS-imi inernerussatut missingersuutit 71,0 mio. kr.-nik ajornerulersillugit. Ajornerulersitsinermut ilaatigut pissutaavoq peqqinnissaqarfiup aningaasartuu-titigut tatineqarnerata aamma suliaqarfimmut tunngatillugu nutaamik isumaqatigiissuteqar-nerup malitsigisaannik peqqinnissaqarfimmut ilassutitut aningaasaliissutissat marluk akueri-neqarsimanerat. Angusassatut missingersuutigineqartut Aasianni peqqissariartortunut akummit-

tarfiup juni 2016-imi ikuallassimanerata kingorna ullutsinnut naleqqussarlugu pilerseqqinneqarnissaanut ilassutitut aningaasaliissuteqarnermit sunnerneqarsimapput

Tamanna tungavigalugu ilassutitut aningaasaliissutitut Inatsisissatut Siunnersuummi takuneqarsinnaavoq ukiumi aningaasanut inatsiseqarfusumi 2017-imi IST-imut missingersuusiarineqarsimasoq 98,6 mio. kr.-nik amigartooruteqarfiussasoq aamma IS-imut missingersuusiarineqarsimasoq 49,3 mio. kr.-nik amigartooruteqarfiussasoq.

Torersumik pissuseqarnissaq pillugu erseqqissaassutigineqassaaq ukiumut aningaasanut inatsiseqarfusumut 2017-imut tungatillugu inaarutaasumik missingersuutit matumani pineqarmata. 2017-imut naatsorsuutit 2017-imi Nunatta Karsiata naatsorsuutaani takuneqarsinnaassapput.

Taamatut oqaaseqarlunga Naalakkersuisut 2017-mut ilassutitut Aningaasaliissutitut Inatsisissatut Siunnersuummut siunnersuutaat Inatsisartunut suliassanngortippara.